

DeKoning mester bati clabo durante su bishita

HULANDA MESTER CUMPLI CU PROMESA

ORANJESTAD(AAN)—Durante su bishita na Antillas, e Ministro Hulandes pa Asuntonan Antillano, Drs. Jan de Koning, lo mester bati clabo ariba cabez, algo cu el a evita di haci durante e ultimo aña aparentemente y Hulanda lo mester cumpli cu su promesa.

Esaki si e partido mayoritario di Aruba persisti den loke el a trece dilanti den un telex cu a ser manda ayera pa Betico Croes, como lider di e partido di Gobierno, MEP, na Jan de Koning.

Den e telex Betico Croes ta bisa cu durante e reunion pa trata destinacion di fondonan, Aruba lo bay exige pa Ministro de Koning cumpli cu promesanan cu el a haci durante e consulta cu a tuma lugar ex artículo 26 di ERNA na November di aña pasa, encunto ayudo temporal pa por enfrenta e actual situacion y tambe e fondo pa restructuracion di e economia Arubano.

E telex di Betico Croes ta muestra cu e promesa a ser haci den luz di e situacion economico cu a empeora despues di ciere di Lago.

Ademas lo mester bini claridad den e asunto di e fondo pa restructuracion di e pais Aruba despues di 1986, esta e wachtgeldregeling pa empleadonan di Gobierno.

Durante e consulta ex artículo 26 di ERNA de Koning a muestra comprension pa e problema cu a surgi relaciona cu e financiamiento di Aruba Caribbean Hotel pa loke ta trata e exigencianan injusto di parti di e compania Nederlandse Kredietverzekeringsmaatschappij pa inversionnan na Antillas.

Un decision encunto e problema aki ta ser spera tambe di Aruba durante e bishita di de Koning.

Si durante e ultimo aña semper de Koning a sabi di subi avion promer cu el a tuma martio den man pa dal e clabo, manera semper el a priminti, tin indicacion pues cu e biah a aki Aruba lo para fuerte.

Otro siman lo mester keda revela si Hulanda lo para fuerte tras di e promesanan y cu si de Koning ta dispuesto pa bati e clabo ariba cabez na 1985.

COMISION DI INDEPENDENCIA TA PARA FIRME TRAS DI STATUS APARTE

ORANJESTAD(AAN)—E comision di Independencia, den cual tur gremio ta representa, y cu mester prepara e cambionan estatal di Aruba, a manda un telex pa Ministro Jan de Koning di Hulanda, den cual e ta muestra di ta para firme tras di e realizacion di Status Aparte entrante Promer di Januari 1986.

E comision a manda un telex cu un contenido igual na esun cu a ser manda pa e partido MEP na de Koning encunto e mes topico. E mensaje ta claro: Status Aparte entrante Promer di Januari 1986, despues cu Aruba a haci uso di su derecho di autodeterminacion, algo cu no por ser cancela pa ningun otro isla.

DANIEL LEO NA CUBA?


ORANJESTAD(AAN)—Segun informenan clave, ex Diputado Daniel Leo lo a viaja pa Costa Rica y Panama pa despues sigui pa Cuba.

Aparentemente ta trata di un viaje di indole personal y mucho informe no por a ser haya ainda.

DIPUTADO KUIPERI A PRESTA JURAMENTO

ORANJESTAD(AAN)—Despues di basta dia cu el a keda eligi como Diputado, Michael Kuiperi ayera a presta juramento enfrente Gezaghbeber Pedro Bislip como Diputado.

Di tal forma el a duna inicio na su carera como miembro di e Colegio Ejecutivo di Aruba. E lo keda encarga pa Bestuurscollege cu e carteranan di Casino, Aruven, Aeropuerto, Politica di Aviacion, Puerto y servicio di loads, Cuerpo di Bombero y Turismo.



DIARANZON 6 DI FEBRUARI 1985 AÑA 4, No. 1248

Preparacionnan no ta ser haci 4.2 MILLON FLORIN PA PALACIO PA GOBERNADOR??

ORANJESTAD(AAN)—Mientras falta apenas diez luna y mey pa Aruba drenta su Status Aparte, no tin ningun indicacion kende lo bira e promer Gobernador, esta Gouverneur, di Aruba. Otro decision cu lo mester cay proximamente ta e esun cu ta relaciona cu e cas pa Gouverneur.

Investigacion conduci pa DIARIO a muestra cu te awe ningun decision a ser tuma encunto construccion di e cas o mihor bisa palacio di Gobernador na Aruba. Aparentemente ta ser calcula cu e palacio lo bay costa alrededor di 4.2 millon florin, suma cu lo mester ser aporta pa Hulanda, comoquiera cu e Gouverneur ta representa Corona na Aruba y su gastonan ta ser cubri pa Corona.

Mientrastanto lo tabata tin varios rapport encunto e sitio caminda mester construi e palacio. Entre otro lo a ser pensa pa traha e cas dilanti di e actual Bestuurskantoor pa e por funciona mihor estando den vecindario di e oficianan principal di Gobierno.

Tambe pensamentonan lo a bay den direccion di e sitio caminda e cas bieo di Gezaghbeber ta situa. E cas aki ta bashi pa hopi tempo y e sitio lo ta adecuado, aunke lo mester traha oficianan acerca.

Investigacionnan a muestra cu aparentemente di parti di polis un rapport a ser traha encunto e seguridad di e Gouverneur y e proteccion cu su palacio mester brinda e representante di Corona.

E asunto aki lo por ser discuti durante e bishita di Ministro Jan de Koning. Informantenan a muestra ariba e urgencia pa un decision ser tuma comoquiera cu tempo ta preta, Mester bay tene un destajo publico pa cuminsa cu construccion.

Mientrastanto lo ta e intencion pa promer cu fin di Mei, proposicionnan pa e Gouverneur di Aruba keda entrega, mientras cu tin indicacion cu e actual Director Interino di Gabinete di Gouverneur di Antillas, lo por bira e Director di Gabinete di Gouverneur di Aruba.